

# OMUKWETU

Registered at the General Post Office as a Newspaper

## ELOK TA YI KOMULONGA 1983

Eshi tuu hatu ka fika mefiku 6.1.1983, otashi ka ninga eedula efele da pita, eshi ovalumenhu 6, Ovawambo ve lishashifa lwotetetete meitavelo ekwakriste pOmulonga, mOndonga.

Oshiningwanima eshi Elelongeleki, Ewilikongudu lEtumo newiliko alishe mOngeleki, ole shi dimbulukwa notali shiivi omapupi omanyasha a ye kOmulonga fiku olo va ka tale apa pa hovela epata ekwa ELOK.

Ombangi ya li po fiku linya 6.1.1883, omuhongi Tobias Reijonen okwe shi hokolola ngaha:

“MOngeleka ovanyasha ova li moikutu itoka, ve li omutumba ponhele i lilile. Okudja mOngeleka, okwa iwa mongulu imwe i lili oyo ya li ya longekidilwa eshasho.”

“MOngeleka inashi dulika mu ningilwe oshilonga shiyapuki, osheshi kaya li ya pwa manga okulongwa omakende nomivelo.”

“Eshasho la hoyelwa nokwiimba eimbilo mOshindonga; Jesus omuholike, Twe ku etele okanona....”

“Ovashashwa aveshe va nyamukula omapulo nondaka ya yela, nakeshe umwe a tumbula eitavelo lovakriste. Ola li efimbo lenyaku nolelinyengifo.”



Elelongeleki ola hoolola okangudulongekidi koshivilo eshi tashi ka kala sha fimana mu ELOK. Omafaneko mahapu okwa ningwa nale okunyenypaleka efiku olo.

Eenghulungu meendjibo, momahepu, moitevo nomoinima ikwao, okwa popiwa navo nale nova ehelwa va longekide.

Oshilyo keshe mu ELOK, osha indilwa fiku 24.10.1982 shi yandje keshe tuu osho shi kwete momalongelokalunga a ELOK, opo ku monike oshidimbulukifo shaalushe ponhele oyo pOmulonga.

Tu lilombweleni hano tu ka shakeneni kOmulonga.

Sebulon Ekandjo



## Etameko lya ningwa nga, ihe ethikilo oli li kokule

Okutala shono tashi ningwa mpaka naampeyaka kombinga yetumo mu ELOK, omuntu oto zimine kutya opwa tamekwa nawa.

Moshitayingeleka shUukwanyama, oshituthitumo shokomumvo osha ningilwe petameko lya Septemba nuumvo mOhalushu. Omwa li aantu konyala 800 nenge 900.

Etumo meni lyongeleki nopondje yayo, olya hokololwa kaasita Josia Mufeti naAbsalom Hasheela. Ondjokonona yetumo moshitayingeleki shoka, oya ningwa kutatekulu Vilho Kaulinge.

Moshipopipiwa she, tatekulu Kaulinge okwiinyengitha omauvito gaapulakeni, sho a hokolola ependafule Noa Kaukungwa, omudhiki gwOhalushu.

*(Oshipopiwa she tala moshifo shika)*

Omufita Mufeti, okwa ti kutya etumo meni lyongeleki ngashingeyi, otali longo mokati kaamboka ye shi okwoopaleka omalutu gawo, yamwe ya tsey a okulesha.

Ihe okwa ti wo kutya naapagani yoyene omo ye natango.

KUuninginino omutonatelishitayingeleki shiyaka, mehokololo lye lyokomumvo 1982, okwa tumbula omahala 7 ga mwena manga omolwiita yoshilongo.

MOndonga omagongalo 18, oga gongela R 3,168,06, nuumvo, omolwetumo moshitayishoka. Egongelo ekwawo, olya ningwa wo moshitayingeleki shUuninginino 1981 moka mwa zi R 17,880,00.

Oshikethangeleki osha futu R 48,309,98 omolwetumo pondje nomeni lyongeleki 1981. Epyatumo lyaSenegal alike otali pula oshikethangeleki R 28,188,00 omumvo 1983.

Moshiketha kayi mo ngashingeyi, oshoka komagongalo inaku za sha. Osho nashi tsikile ngawo?

Sebulon Ekanjjo

## Limbesitelela Omukwetu 1983

### ONDANDO YA LUNDULUKA

Ewilikongudu loshifo shOmukwetu moshoonqalele shalo ohani ei, ola tokola ondado yOmukwetu 1983 i lunduluke. Efininiko mwaashi ola dja melondo leendado deembapila, eendomo, eendjabinosho tuu oipumbiwa ikwao i na sha nomanyanya ngido.

Ondado yoshifo omudo 1983, otai ka kala ngaha:

MuNamibia nomu SA R5-00 komudo  
Palwe muAfrika R8-00 komudo

KuEuropa naAmerika modila R13-00 komudo  
Mosikepa R11-00 komudo

Ondado yoshifo shimwe ashike R0,30

Ohatu lineekele ovaleshi otava tambula elunduluko leendado edi nomwenyo muwa.

Omudo 1981 otwa kala ashike tu na ovalishangifi vanini, noimaliwa yavo nande ya li eyambidido liwa kolonga yOmukwetu inai dula okutuvikila omhumbwe aishe oyo ya li tai pula R21,199-87.

Eshi inatu mona oimaliwa aishe oyo, otwa kala nongunga R7,047-36. Omuleshi, tala hano nhumbi to yambidida oilonga yoshifo shoye shi twikile alushe

Osenda yoye keshe yomaano ile yokulilandela oshifo otai fimanekwa metwikilifo loshifo eshi.  
Hamushanga wOmukwetu





# NATU NINGII PO SHIKE NATANGO?

## - EPULO ENENE

Ku Dr. K. Dumeni

"The ne otamu ka pewa oonkondo, Ombepo Ondjapuki ngele te ya mune. One notamu ka ninga oonzapo dhandje." Iil.1:8.

Otwa pumbwa shike notatu ningi po-shike natango, opo Evangeli lyoshilongo li taandelithwe? Onduuvite osha yela kutse aakriste kutya: Ongeleki yaJesus Kristus oyo olutu lwe, tu na omwenyo.

Omwenyo gwOngeleki otagu dhimbululwa miilyo yayo ayihe, nkene tayi thiminikwa kohole okugandja Evangeli ndika lyehupitho komushitwa gwa Kalunga kehe.

Ngashi Jesus a li ta ningi; "okwa uwitha Evangeli lyoshilongo nokwa aludha aavu" Mat.9:35.

Otwa pewa omauyelee kutya; otu na aantu taa pumbwa Evangeli meni nopondje yoshilongo shetu. Otu shi shi ngele itaa falelwa evangeli otaa ka sila muupagani nomuulunde wawo.

Otwa tseya wo kutya ngele twe ya pe evangeli otaa hupithwa. Otaa ka pewa wo iinima yehumokomeho, miinima yilwe ngaashika tse tu li ngashingeyi.

Ihe nando otwa tseya oluhepo lwawo noompumbwe dhawo, omapulo oge li komeho getu natango notage tu pula;

Otaa kwatha ngiini? Olye te ya kwatha? Otaa kwathwa uunake? Otu na tuu sha oku ya kwatha nasho? Otatu tameke naanaa peni? nosho tuu.

Shika otashi tu fala kepulo tali landula:-

Omolwashike ana tatu popi, notatu longo oshilonga sha Kalunga shEtumo? Otwa tsa kumwe kutya; Otu uvite ongunga okupandula Kalunga molwevangeli lyehupitho ndyoka twa pewa.

Olukeno lwopakriste otalu tu thiminike. Otwa tila kutya aantu ya Kalunga otaa si inaa uwithilwa evangeli. Ethimbo olyo efupi wo.

"Olukeno lweni nalu tseyike kaantu ayehe Omuwa oku li popepi" Fil.4:5.

Otu na olukeno olunene nayo okuwa nokutala aantu taa yi mekano. Otashi tu fike nayi. Notashi tu lulumike nayi moomwenyo dhetu.

"Oshoka osho Kalunga a li e hole uuyuni okwa gandja epona lye" Joh.3:16.

Ohole otayi tu thiminike" Paulus osho ta ti; 2Kor.5:14. Kombinga onkwawo ngele tse aana ya Kalunga shili, nena otu na OKUVULIKA KUYE: Otwa tumwa. "Indeni" na "ka ningeni ayehe aalongwa yandje" Osho Jesus te tu tumu nonena Mat.28:19.

Otwa pumbwa oonkondo:

Onduuvite kutya nando einyengo lyohole yEtu-mo omo li li mOngeleki yetu ya ELOK, osha yela kutya otwa pumbwa sha natango:

Otwa pumbwa oonkondo. Oonkondo dha dhiladhilwa moshitya shika, odho oonkondo oonene hadhi tatula omamanya.

Oonkondo hadhi enditha omashina omanene. Hadhi ulula nokuteya iyela ya kola. Hadhi topa ngaashi ondilimani, noomboma nosho tuu.

Oonkondo dha tya ngawo, odho oonkondo dhombepo, odho ompumbwe yooitaali yOngeleki yetu.

Ngele otwe dhi pewa nena nOngeleki yetu otayi ka longa iilonga yoonkondo okuteya po oonkondo dhomutondi Satana, meni nopondje yoshilongo shetu.

Oshike tashi imbi tu pewe oonkondo ndhoka? "Ombepo Ondjapuki ngele te ya mune, one otamu pewa oonkondo, one notamu ka ninga oonzapo dhandje".

Osha yela otwa pumbwa Ombepo Ondjapuki mutse opo tu pewe oonkondo. Otatu yi pewa ngiini? Otatu yi pewa ngele tatu kutha po iisiikilitho yondjo mutse mbyoka tayi imbi Ombepo yi ye mo.

Ota indile tu pewe omagano ngaka gOmbepo, Ondjapuki. Otatu ga pewea shaa tatu ga indile, ongele muuwike nenge mongundu Iil.2:1-12. Okwa tiwa; "Opo kehe ngoka gwomokati kawo okwa lambelwa ku limwe. Oyo ayehe oyuudhithwa Ombepo Ondjapuki"

EINDILO KWAAYEHE: Omagongalo agehe ga "Olye ta punduka ngame ndaa pye?" 2Kor.11:29.

Ohole yaKalunga yokuhola omuntu, uuyuki ngele omo yi li mutse, aalanduli yaJesus, otayi tu thi-

Tala kep. 4





XX



Momafano ngaka gaali; efano pombanda Ewili-kongundu lyEtumo mOngeleki li li miipundi. Pokati omunashipundi Josia Mufeti nokolumoho popepi amushanga gwEtumo Dr. T. Shivute. Efano pèvi Aaserere ye li mosikola.

## Natu ningii po shike natango - epulo enene

### Dha za kep. 3

*minike wo okugandja shoka shi na ondilo, noshi holike shetu komeho giinima ayihe.*

*ELOK, noongundu dhi ili nodhi ili mOngeleki, otandi indile tu tale oshilonga shika sheuvitho lyEvangelii lyehupitho, opo aantu ya hupithwe.*

*Osho oshinakugwanithwa shetu shotango. Osho wo oshinakugwanithwa shomukriste kehe mu ELOK.*

*Ngele tatu dhiladhila Etumo muAngola no muSenegal noompumbwe dhalyo adhihe, onawa ongundu kehe nomawilikongundu ga tale kutya iimaliwa yawo omumvo kehe otaa gandja mo omwaalu gu thike peni okukoleka oshiketha shEtumo lyOngeleki:*

*Ongele aagundjuka, aalumentu, aakiintu. Oongundulwiimbo, aanasikola, aanona, iigongi yaanashilonga iituthi yi ili noyi ili nosho tuu.*

*Ongele miitayi nenge mOngeleki ayihe. Ando otatu pewa oonkondo opo atuhe tu longe oshilonga shetumo. Ethimbo lyokuuvitha olya yalulwa. Ethimbo efupi.*

*Otwa pumbwa omadhiladhilo omape noondunge oompe nomikalo omipe okuhwamitha ohole yEtumo mutse.*

*Elalakano lyetu olya yela kutya: Otwa hala okukalala tango twa hupithwa otseyene. Otwa hala wo okukondja opo Ongeleki ya Kristus yi kale ya kola, tu kale twa udha ohole ya Kalunga ndjoka e tu hole nayo, notatu yi holola miilonga yetu yesiku kehe. Otu na Etumwalaka:*

*Evangelii lyoshilongo, ano uuyelele woohapu dha Kalunga, neitaalo ndyoka tu na, otwa hala oku li gandja komushitwa gwa Kalunga kehe.*

*Oshilonga sha tya ngeyi osho EHALO LYA KALUNGA, noshinakugwanithwa shomukriste kehe. Tashi ti oshOngeleki ya Kristus ayihe, onkee Kalunga oye ne mu longekidhile uwanawa kehe okugwanitha ehalo, ye na longe mutse shono she mu opalela, omolwa Jesus Kristus.*

*Oye na simanekwe aluheluhe Amen.*

**Limbesitelela  
Omukwetu 1983**



# KAULINGE TA HEPAULULA

## EITAVELO LANOA

Kaukungwa kaShangheta, okwa kala omupiya wohamba yaUkwanyama mOputu yedina Namhadi. Kaukungwa omulumenhu wonyati, iha te-wa nomukolokoshi.

Osho omufita Vilho Kaulinge, oo e li paife moshipundi shetulumuko mOndobe, a hokolola epe-ndafule meitavelo Noa Shangheta.

Moshivilo shinene shetumo shokomudo mOhalu-shu, omushamane Kaulinge okwa ti kutya fiku Kaukungwa va shakena nomutumwa Omundo-wishi, olo fiku oupaani waye wa teywa.

Naashi Kalunga okwe shi endifa ngaha, shi ninge elao kOvakwanyama, osheshi hanoupu ngeno evangeli la tambulwa mOshilongo eshi, osho omu-kulupe a tumbula nomukumo.

Okwa twikila ehapu laye ngaha kutya kasha li shipu kuKaukungwa a hepaulule koshipala sho-hamba Namhadi, ipwidi noya handuka, eitavelo olo a tumbula komutumwa.

Molwoukolele womhepo yaye, nomesho taa tale moshipala shohamba, ohamba oya ka koneka ku-tya muKaukungwa omu na sha paife inashi ka-la mo shito.

Kovapwilikini vaye, tatekulu Kaulinge okwa ingi-da nondaka yopombada tai ngengema:

“Omwa pya tuu shili meitavelo unonaa nye?”  
Eshi okwe shi endulula luhapu.

Omukulupe Kaulinge okwa xulifa ehapu laye no-kunangeka epata la Kaukungwa alishe la li mo-shivilo noli li natango meitavelo, nouputa.

Omushamane Kaukungwa (Noa), oye a tunga Ohalushu, noye xe yomufitaongalo Sem Kauku-ngwa ou a xulifile oweenda waye 1969 meongalo olo.

Sebulon Ekandjo

## Omolwashike omuntu e na okushashwa

Pashito omuntu oku li ashike omushitwa gwa-Kalunga, ihe haomuna gwaKalunga.

Meshasho omuntu ta ningi omuna gwaKalunga, nota vulu okwiithana, Kalunga: “Tate” nenge o-kugalikana ngeyi, “Tate”.

Mokwiitaala Jesus Kristus nokwiishashithila medhina lyaKalunga katatu gumwe, nena omu-ntu okwa ningi omuna gwaKalunga.

Eshasho olyo oshipango sha Jesus sha hugunina e shi pe aalongwa ye, manga inaa ya ku He me-gulu. Mat.28:18-20.

— Mu ayihe mbika omuntu oto vulu okukoneka oshipango shelongo lyOhapu yaKalunga, ndjoka ya nyolelwa mEtestamenti Ekulu nEpe.

Oshipango okulonga oonakushashwa ehalo lya-Kalunga, opo ye li uveko nawa, yo ya vulike kulyo, yo ya tseye nokukoneka esilohenda lyaKalunga ndyoka ye li taamba mEshasho Eyapuki.

— Meshasho owa tameke okweenda ondjila yi-mwe naKristus, nontseyohalompumpwe lyaKa-lunga okupumbwa omuntu.



## Mefano omusamane Kaulinge ota popitha oshituthi shEtumo mOhalushu

— Eshasho kali shi ethikilo, ihe olyo etameko lyonkalamwenyo ompe naJesus Kristus, nolyO-ndjila ompe omuntu u na okweenda nayo. Iil.8:39.

## Peshasho eyapuki ohapu holoka shike?

Peshasho lyashili opu na okukala iinima tayi la-ndula; [i] omeya, [ii] oshipango shaKalunga Mat.28:18-20 [iii] nehempululo lyeitaalo.

— Pwaa na iinima ayihe ya tumbulwa meteteke-lo, eshasho kali na shoka tali kwatha omuntu.

“Eshasho kali shi omeya ageke, ndele olyo ome-ya ga kwatelwa kumwe noshipango shaKalunga moohapu dhe.”

**Tala kep. 6**



## Ampweya ina yamukulwa natango

M<sup>O</sup>shifo sh<sup>O</sup>mukwetu No. 16.1982 ep. 8, E. J. Ampweya okwa pulile ngele konima yedhimopo lyoondjo, ohaku kala kwa kambela sha natango. Nongele ihakuthigala sha, kutya omolwashike omusita ihaa shunwa we moshilonga konima yokudhimitwa po kwe oondjo.

Omuyamukuli komapulo ngano, okwa li a yamukula pafupi lela noku ulika koshitokolitho 146 sh<sup>O</sup>shigongingeleki sha ELOK m<sup>O</sup>ngwediva 1981.

Ihe ngoka ta popiwa moshitokolitho 146 m<sup>E</sup>kota mpango nenge 96 m<sup>O</sup>maufomhango, kee shi omunashilonga kehe, ihe omusitagongalo ngoka a mwenekwa k<sup>E</sup>lelongeleki.

Pakuuva ko kwandje, epulo lyomusamane Ampweya oli li pekuthwoshilonga lyaasitagongalo, hapemweneko lyawo. Ngele ondi li mondjila, ano epulo lyaAmpweya inali yamukulwa.

Tomas M. Ndiwakalunga

### EYAMUKULO

Omuleshi omusimanekwa, ondi inekela shoka she ku tsimine kashona, oshitokolitho 146, shoka wa ka konga m<sup>O</sup>kambo komautho g<sup>O</sup>ngeleki.

Etokolo lyonomola 146 oli li natango moontokolwa dh<sup>O</sup>shigongingeleki sha ulikwa, inali tulwa manginga mokambo.

Uuna lya yi mokambo, otali ka kala monomola 90 yomaufomhango notayi leshwa ihe ngeyi:

Eenghedi diwa domufitaongalo mefimbo lokumwenekwa kwaye ile okukufwa kwaye....., Elelongeleki otali dulu oku mu shunifila molonga.

Omusamane Ndiwakalunga, sho wa ti kutya oshitokolitho shika otashi popi ashike aasita, ou li mondjila. Ihe osho wo sha kala sha mangela mo aanashilonga yalwe mboka ihaa shunwa moshilonga paitokolitho 99[2],101 pakambo hoka taka longo natango.

Ngaashi wa koleke E. J. Ampweya meuvoko lyedhimopo lyoondjo, osho nangame ondi li pamwe nane moshinima shoka.

Amushanga

### EPUKULULO

M<sup>O</sup>mukwetu No. 16/1982 omwa longifwa omuvalu u li meni lomulongo, meenomola ngaashi ovanhu 5.

Eshi sha ndjanga noshopashinanena okutula ononola meendada (ovanhu vatano) Okulongifa onomola aike, otashi talika ko ounye wanakunyola.

Vali natango m<sup>O</sup>mukwetu No.17/1982 ep. 5 okwa tiwa etengeneko longudu ovanhu 800 ile 9000.

Ondi wete etengeneko eli oli lili kokule unene. Ile pamwe opa diladilwa 800 ile 900?

Mashilili Ueyulu

### EYAMUKULO

Omuleshi omufimanekwa Ueyulu, tangi unene kepukululo loye liwa moimima ivali. Moshinima shotete, katu na enyamukulo, ohatu tambula ashike omaye mawa.

Moshitivali, ohatu yandje ombili kovaleshi, konomola ya xuuninwa. Otwa li shili twa diladila 900.

Hamushanga



Omusita Ananias Iita

— Eshasho otali ku fumvike meso notali ku yumudha.

— Olutu lwoye otalu yogwa nomeya geshasho e talu yele.

— Oondjo dhoye otadhi thetwa po nombinzi ya Kristus e to yele.

Mombimbeli otaku tiwa:

— eshasho eyogo lyedhimopo lyoondjo, Iil.22:16.

— oloyo tali ku yapula.

— oloyo tali ku yukipalitha, omedhina ly<sup>O</sup>mwana Jesus Kristus 1 Kor.6:11.

Eshasho otali hulitha po eso lyokomwenyo, nomwenyo omupe muKristus otagu holoka. Omuntu omukulu ota hulu po, nomuntu omupe ota holoka.

Rev. A. Iita



# UUNONGO TAU ITHANA

OSIKOLA YOMBIMBELI MONGWEDI-VI., OTAYI TAAMBA AALONGWA AAPPE OMUMVO 1983. MBOKA TAA KE YA MOSIKOLA OTAA TEGELELWA YA TUME OMAINDILO GAWO MOOMBA-PILA NGASHI TADHI LANDULA MPAKA:

1. *Ombapila yeindilo ya nyolwa komwiindili mwene*
  2. *Ombapila yepopilo ya shangwa komulongi gwoye*
  3. *Ombapila yenyolululo lyOnzapo ya shainwa komulongi gwoye*
  4. *Ombapila yegongalo*
- a) *Omuthika gwokulongwa kwoye nagu kale wa pita St. III nokuuka pombanda*  
b) *Omwiindili na kale e na uundjolowele wopalutu. Onawa ngele to pewa omba pila komundohotola nenge komupangi*  
c) *Oombapila dhoye nadhi kale dha thika pehulilo lya November 1982*  
d) *Mboka ya taambwa otaa ka tseyithilwa, itaa pumbwa okuya kOngwediva ya pule omayamukulo.*  
e) *Ofuto yosikola oyo R50.00*

*Tuma oombapila dhoye kondjukithi ndjika:*

OSIKOLA YOMBIMBELI, ONGWEDIVA  
P.S 5505, OSHAKATI, 9000

# OMBAADHILILA

## MAANDJAKAPEWANGOLO

Teofilus-Kondjela, okamwanamati kaJosef na-Aino Kapewangolo, mOlukonda, oka mana oondjenda dhako 26.9.1982 ombadhilila.

Oshituthi shefumviko osha ningwa 2.10.1982 mO-ngeleka yaandjawa. Oka li ke na ashike omimvo ne nomwedhi gumwe.

Oyendji moshituthi shika nando ya adhika ya longekidha oongala dhokombila, omayele ga zile moshinyolwa shomuleshi gumwe gwOmukwetu, ku tamekwe elongekidho lyomamanya pethimbo lyoosa, peha lyoongala tadhi kana esiku limwe alike, osha tulwa miilonga.

Ongalo ndjika yemanya oya gu R130,00. Ngiika oshiholelwa shika otashi ka landulwa koyendji.

Omuwa na hekeleke egumbo lyaKapewangolo.

XXXXXXXXXXXXXXXXXXXXXXXXXXXXXXXXXXXX

Natango okamati Hofni Shipanga (19), oka mana oondjenda dhako ombadhilila manga ke li mondjila yako okuya kosikola. Oka dhengwa koshihauto.

Osikola ye oya li kOnathingye yuumbugantu.  
Maria M. Enduwa

## A YI KETULUMUKO

Meme Hilja Ndapewoshali Shipandeni, Omwene okwe mu dimbulukwa moilonga yaye eshi e mu ifana po mounyuni muAguste neudo, konima yefimbo lile meembete.

Okwa fiya po omulumenhu waye nounona vaye vatano.

Isak Nd. J. Nangolo

## SIKORA ZAMBIBELI KONKURENKURU 1983

*Ninka ehundiro lyoge koSikora zoMbibeli elima 1983, koMukuronasikora:*

SIKORA ZOMBIBELI ZAKAVANGO  
NKURENKURU, P.BAG 2084,  
9000 RUNDU

*Oyininke tai hepwa:*

1. *Ehundiro lyoge mwene*
2. *Epopero lyovakurona woge*
3. *Mbapila zepongerero lyoge*
4. *Etjangururo lyonzapu zoge zokuhulilira*



**ONHELE YOMULONGI  
MOSHIGAMBO HIGH SCHOOL  
OTAMU PUMBWA OMULONGI 1983**

*Ota dulu okulonga oilongwa ei:*

*OSHINDONGA; mostanda 8-10*

*AFRIKAANS mostanda 6-7*

*AGRICULTURE mostanda 6-7*

*HISTORY mostanda 6-7*

*OULONGELWE: Odjapo yomatrika noulongi ile shi du-  
life.*

*ONDJABI: Otai kundafanwa nElelongeleki la ELOC.*

*Tuma eindilo loye kondjukifi ei:*

**OMUKULUNHUFIKOLA  
OSHIGAMBO HIGH SCHOOL  
PRIVATE BAG 2026  
9000 ONDANGWA**

**2 YA PILE MEGUMBO**

Egumbo lyaSamuel Johannes Kanyemba naSaara Samuel Shiyamba, mOshitayi olya lunguna po thilu komulilo neliko lyalyo alihe. Uunona wawo; Hilma koomvula 3 naHelena koomwedhi 9 nawo owa pile mo.

Oshiponga shika osha ningwa muAguste numvo. Inapu tseyithwa shono sha eta oshiponga shi thike mpoka.


Egongalo lyaShitayi, sho lye shi kundana, olya ka dhima ompile niimaliwa R 827,43, oombete niizalomwa.

“Mukweni mu uvila ta li.”

**A ZIMBUKA MUUYUNI**

Meme Fransina Kondja Samuel Iita, mOnangalo, Kalunga okwe mu zimbula muuyuni mbuka konima yuuwehame wethimbo ele.

Meme Kondja okwa yakula ethimbo ele aatumwa moshipangelo shaTshandi mUukwaluudhi. Kalunga na hekeleke ayehe mboka ye mu shi.



**OMUKWETU**

Oye oshifo shOngeleki Onkwaevangeli paLuther yomOwa-  
mbokavango.

Ohashi nyanyangidhwa mOniipa.

Omukuluntu gwoshifo omumbisofi dr. Kleopas Dumeni,  
Amushanga gwoshifo omusita Sebulon Ekandjo

Ondando yoshifo komumvo muAfrika alihe R2,60. Kombanda  
yomafuta R5, 00, nondhila R6, 24.

Oondando nomambestelo agehe naga tumwe kOmukwetu,  
Oniipa, P.Bag 2013, Ondangwa, 9000

EV. LUTH. OWAMBOKAVANGO CHURCH PRESS  
PRIVATE BAG 2013, ONDANGWA 9000 SWA/NAMIBIA